

أوجاع نفسية

الطبعة الأولى

١٤٤٤هـ - ٢٠٢٣م

اسم الكتاب:	أوجاع نفسية
اسم المؤلف:	نورهان عبدالرازق أمام
التدقيق اللغوي:	خلود أحمد
تصميم الغلاف:	وحيد محمد
الإخراج الداخلي:	خالد محمود
رقم الإيداع:	٢٠٢٢ / ٢٢٨٧٨
الترقيم الدولي:	٩٧٨-٩٧٧-٨٦٣٣٤-٧-٤



ش - حسن خطاب - قسم يوسف بيك - الزقازيق - الشرقية



01020439639



massar.pub1@gmail.com



مسار  
للنشر والتوزيع  
Massar Publishing & Distribution

جميع الحقوق محفوظة، ولا يسمح بإعادة إصدار هذا الكتاب، أو أي جزء منه، ورقياً أو إلكترونياً، سواء بشكل كامل أو جزئي أو عرضه مجاناً عبر أي وسيلة وبأي شكل من الأشكال من دون الحصول على تصريح خطي من دار مسار للنشر.

# أوجاع نفسية

نورهان عبدالرازق أمام





## إهداء

إهداء لأبي - رحمه الله - وأمي بارك الله في عمرها.

بابا وماما كانوا سبب رئيسي في القوة اللي بظهر بيها.. بابا وماما  
كانوا السند جسدياً ومعنوياً.

والله ما كنت بفتقد عدم وجود حد في حياتي لأن وجودهم كان  
غانيني عن أي حد، أنا لو كان ربنا كتيلي إني أمر بشدة في يوم من  
الأيام فأحتسب إني مريت بيها عشان تبقى سبب في دخولهم الجنة.

ما صبرهم على مرضي في يوم من الأيام مكانش هين، ما بالكوا  
بكل دقيقة كانوا بيعاهدوا فيها عشان يخرجوني من شدتي..

دعواتكم لأبي بالرحمة.. ولأمي بالبركة في الصحة والعمر..

كنت كاتبة إهداء لزوجي العزيز الحبيب، بس في مرة وأنا بكتب  
لقيته بيقولي قومي اغسلي المواعين فقررت إني هسحب الإهداء  
لحين إشعار آخر.



كل حد هيقرأ الكتاب ده هيلاقى إن الكلام اللي فيه  
بيتوجهله..

عارف ليه؟!

لأن كل كلمة مكتوبة اتكتبت بحب.. بصدق.. من  
القلب.. فهتوصل للقلب..

## مقدمة

كل كلمة مكتوبة في الكتاب ده بعترها خلاصة سنين  
 كثير عيشتها.. عيشتها بكل ما فيها من تجارب شخصية،  
 منها حاجات اتعلمتها من التعامل مع البشر، ومنها  
 معلومات اكتسبتها وطبقتها على نفسي وغيرت حياتي  
 للأحسن..

وحابه كل اللي بيقراً الكتاب ده حياته تبقى أحسن..  
 في أمور كثير لو استسلمت ليها بأسم أنا راضي..  
 هتفضل طول عمرك على نفس الحال ومش هتتقدم  
 خطوه..

أحيانا الحياه بتحتاج شويه تمرد عشان نستحق الحاجة  
 اللي بنفكر فيها.. ونقدر نفذها..



في فرق بين الرضا والإستسلام السلبي..  
متخلّش الواقع يسيطر عليك.. سيطر أنت عليه..  
أصنع الواقع الي بتمناه..

# الباب الأول أوجاع نفسيّة

هتفضل تشتكي للناس لحد إمتى؟!  
 كام مرة في يومك بتقول أنا تعبان.. أنا مخنوق.. أنا  
 متضايق.. الدنيا معنداني.. ليه بيحصلي كل ده؟!  
 ها اشتكيتلهم كام مرة؟! مشكلتك اتحلت.. ارتاحت  
 نفسيّاً؟

بالعكس...

وفي الآخر هتلاقي كل حد بتشتكيه يبعد عنك..  
 متفتكرش حد هيفضل معاك وأنت في أسوأ حالاتك،  
 هيختفوا وهيظهروا تاني لما ترجع كويس وبطبيعتك..  
 طيب لسه شايف الدنيا سودة؟!!

شايف الكلام الي كنت بتقوله للناس فوق ده، ده  
 أكبر سبب في إنك شايف الدنيا سودة، جرّب كل ما  
 تحس إنك هتوصف أي شعور جواك مضايقك توقف

تفكير توقف تكرار للكلام ده "أنت بخير، أنت كويس  
وكل حاجة هتبقى تمام" بس خليّ عندك حسن ظن بالله.

لسه بتقول لو الانتحار حلال كنت انتحرت؟!

طيب ولما تنتحر ده حل يعني؟! مين في الحياة يستاهل  
إنك تخسر حياتك؟!

ولا أي حد..

طب أهلك.. الناس الي بتحبك.. سامعك وأنت  
بتقول مفيش حد مهتم بيا ولا حاسس بوجودي؟!

خلاص سيبك من كل دول..

"نفسك" تستاهل إنك تعافر عشانها، دورك في الحياة  
لسه منتهاش، عيش وعافر اختار تقابل ربنا وأنت مستعد  
تقابله.

طيب لسه حاسس إنك بترتاح أكثر وأنت لوحدك؟!

التعامل مع الناس بقا مرهق نفسيًّا صح.. لا مش  
 صح.. بعض الناس مش كل الناس.. قرب من الناس  
 الي بترتاح في التعامل معاهم وابتعد عن أي حد حاسس  
 إن وجوده.. كلامه.. نظراته.. طريقته.. بتضايقك..  
 وسيب الي يزعل يزعل، من حقتك تحمي نفسك من أي  
 حاجة تضايقها.

لسه بتهرب من يومك بالنوم طول النهار عشان  
 متقابلش حد.. عشان متعاملش مع حد؟!  
 عشان معندكش طاقة تستحمل أذى نفسي جديد...  
 عشان متضايقش حد ولا حد يضايقك...  
 تعالى أقولك على سر يخليك تخرج من الدائرة الي أنت  
 حابس نفسك فيها دي!

**"انْعُودِ نَقُولُ لَّا!"**

بَطْلٌ تَیجِی عَلٰی نَفْسِک!

مثال..

## تعالیٰ معایا المشوار ده..!

(هترد من غیر ماتقووووول معلش، متمعلش حد  
على حساب نفسك) لو مناسب إنك تروح معاه روح  
مش مناسب بيقى بدون كسوووووف رد وقول مش  
مناسب ليا عادی جداً.....

سيب الي عاوز يزعل منك يتفلق طالما أنت مغلطتش..

مثال..

بعد موقف ما لاحظت إن حد قالب وشه عليك..

إسلوبه متغير معاك، في حين إنك شايف إن الموضوع  
مش مستاهل أو تصرفك كان رد فعل أصلاً لحاجة هو  
عملها معاك ضابقتك.

الحل إنك (تتجاءل) سببه يراضي نفسه بنفسه،  
لو اعتذرت من باب إنه يفك قلبت وشه، يبقى أنت الي  
جبته لنفسك وهتشوف الوش ده كتر.

بَطْلٌ تَتَكْسَفُ تَكْسَفُ غَيْرُكَ لِأَنَّ غَيْرَكَ مَرْدَدُشْ لِحِظَةِ  
إِنَّهُ يَكْسِفُكَ!

مثال..

## بِتَقْبِضْ كَام؟!

الحمد لله كله خير من عند ربنا.

أيوه یعنی بتقبض کام؟!!

تجاهل وغيرَ الموضوع وميهمكش رأي حد فيك،  
المهم إنك واثق في نفسك وتصرفاتك، من حقك إن الي

قدامك يحترم خصوصياتك وميتعداش حدوده معاك.

متسمحش لحد يشككك في نفسك!

مثال..

إيه القرار اللي أنت خدته؟!

ده أنت على طول كده بتتصرف من دماغك وكل تصرفاتك غلط.

في حين إنك مقتنع جدًا بقرارك ده وواحد رأي كذا حد وخلاص واثق إنك ماشي صح، لو الشخص مهم بالنسبة ليك تقدر تشر حله وجهة نظرك، وسواء اقتنع أو لا في تلك الحالتين أنت مكمل.

ولكن لو ميهمكش أمره يبقى وصله إنك اتضايقت ومش متقبل كلام في الموضوع ده تاني.



## "قيد ما يحاسب نفسك"

اسأل نفسك أنا بحاسبها ليه؟!!

وعشان مين؟!!

طب الشخص ده لو مكانك كان هيحاسب نفسه  
عشانك، ولا كان هيطلع لنفسه ألف سبب يبررله  
تصرفه وهيسيبك تتفلق؟!!

كل الناس عندها أسباب ودوافع عشان تغلطك  
صح؟!!

وأنت بس اللي بتغلط ولازم تقعد تبرر وتعتذر، وفي  
الآخر أنت اللي هتطلع كلت الجبنة..

عارف ليه بيحصل كده؟!!

## "أنت اللي اديتهم التصريح"

مستغرب ليه؟!

أيوه أنت اللي اديتهم التصريح بكده.. عارف ازاى؟  
لما اعتذرت عن فعل غلطوك بيه فحسستهم إنهم على  
حق بس عشان أنت باقي عليهم، وعشان عارف إنهم  
بيحبوك.. عشان عارف إنهم ميقصدوش يزعلوك!  
فى الوقت اللي أنت بتوجدلهم جوا نفسك مبررات  
عشان تصفى وتعدي ومتزعلش ومتعاتبش.. هما  
بيوجدولك ألف مبرر عشان يغلطوك ويقنعوا نفسهم  
إنهم على حق...

## "أنت اللي كنت متاح طول الوقت"

عشان بس ميتقالش عليك إنك مش جدع.. فبضطر  
إنك تكون متاح في أي وقت يطلبوك فيه..  
طيب..

هما متاحين بالنسبالك طول الوقت؟!  
لأ طبعًا..

هما عندهم حياة مشغولين فيها، إنما أنت مش من  
حقك يكون ليك وقتك الخاص، بس أرجع وأقولك  
أنت اللي اديتهم التصريح.. اديتهم التصريح لما غلطوك  
في حاجة عملتها معاهم وهما أصلاً عملوها ويعملوها  
معاك وأنت بتتقبلها وبتسكت وبتعديها وبتلتمسلهم  
ألف عذر وعذر.

متدیش أكثر ما هتأخذ، سواء حب - تقدير - عشم،  
الی بیزید عن حده بیقلب ضده زی ما بیقولوا.

## "منخصصش حد إنه أقرب حد ليك!"

متخصصش حد إنه أقرب حد ليك!

وقبل ما تخصص وتسالني ليه..

أنا هسألك كام سؤال وجاوبني بعد ما تفكر!

لو أنت تعبت.. الشخص ده هيزعل عليك؟!  
آه..

تمام مقولتش حاجة..

هيكون جانبك?!!

جاي..

هيحس بيك?!!

لااااااااااااا مش هيحس بيك!

مش هيتوجع لوجعك لأ..

جائز يتأثر، لكن يتوجع ويحس بيك ويبقى فيه في حياته حاجة ناقصة..

لأ مش هيحصل!

متكذبش على نفسك...

طب أنت بتقاوح ليه ها؟! هو أهم عندك من نفسك؟!

طب تعالى أسألك سؤال تاني...

لو نفس ذات الشخص ده حد من دمه تعب نفس التعب... أمه - أبوه - حد من إخواته - حد من أولاده - أو هو شخصيًّا..

ها؟!

هتلاقيه فجأة حس بيه واتوجع لوجعه..

هتلاقي حياته ناقصها فرح كبير بسبب إن قلبه موجوع

على الي منه..

هتلاقيه بيخاف عليه وبيحرص إنه يبقى كويس دايماً..

عارف ليه؟!

عشان من دمه...

إحساس طيعي مش بقولك كده إنه وحش ومش

بيحبك، بس أنت مش من دمه!

إذن أنت مش أقرب حد ليه...

إذن أنت كمان متخصصش حد إنه أقرب حد ليك..

عشان متتوجعش..!

## "بلاش العشم ياخذك للسما!"

بلاش العشم ياخذك للسما..

متخليش مشاعرك تتحكم فيك!

خليّ تصرفاتك ومعاملاتك تعدي على مخك الأول..  
طريقة تفكيرك غير طريقة تفكير الي قدامك.

ومش معني إنك بتحسن الظن بالناس يبقى هتقابل  
بنفس حسن الظن منهم ليك!  
لأ...

ممكن تتقابل بالعكس!..

وتتعرض لتصرفات منهم نتيجة لسوء ظنهم، وفي  
الآخر التصرفات دي مش هتأذي حد غيبيير "نفسيتك"



الي أنت ماشي تسلمها لكل حد يدمر فيها شوية..

## ”أنا السبب؟!“

بتسأل نفسك دلوقتي طب سوء ظنهم ده أنا السبب  
فيه؟!

بررررردوا بتحاسب نفسك؟!

ما قولنا سييها في حالها!

لأ ياسيدي مش أنت السبب..

أنت عارف لو أنت السبب!

مش هتسأل نفسك السؤال ده... مش هتحاسب  
نفسك أصلاً!!!!.

## "مين السبب؟!"

طيب.. مين السبب؟!

مش مشكلتك.. مشكلتهم هما!!!!!!.

بطل تفكر في اللي حواليك..

فكر في نفسك وأحميها وأسعى إنها تكون أحسن!

محدث غيرك هيحافظ عليها، ومحدث غيرك هيتوجع  
لوجعها..

أصلاً لما بتتوجع محدش هيحس بالوجع ده غيرك  
أنت..!

## "وجع مسنخي"

الوجع ده بيطلع في هيئة أوجاع في جسمك وتصرفاتك  
وردود أفعالك..

لسه بتلف على الدكاتره ومش عارف فيك إيه؟!

لسه بتسأل نفسك ازاي بيحصلي كل ده وأنا لسه في  
العشرينات.. أو مال لما أكبر شوية هيحصلي إيه؟!

لسه بتتعب من أقل مجهود.. الحاجات اللي متعتبرش  
مجهود أصلاً؟!

بلاش كل ده...

لسه بتحس بأوجاع الدنيا أول ما بتصحي من النوم..  
ولسه أصلاً اليوم مبدأش؟!

لسه بتسأل نفسك هو أنا تعبان ليه كده، ده أنا لسه  
معملتش حاجة في يومي.. يادوبك فتحت عيني؟!  
حد حاسس بكل ده غيرك؟

لأ صح؟

يبقى متصدقش حد بيقولك أنا حاسس بيك!  
من وجهة نظرهم حاسين بيك، لكن محدش سامع  
الكلام اللي بيدور جواك..  
محدش حاسس بوجع جسمك.. وزعلك على نفسك،  
وإنك بتقوم وتواجه الأيام وفيك أوجاع لما بتجيلهم  
هما...!

حياتهم بتقف وبيناموا في السرير لحد ما يتعافوا..  
الفرق بين أوجاعك وأوجاعهم..  
إن أوجاعك ملهاش علاج زيهم.. لأنها مش أوجاع

جسدية ليها علاج..

لأ... دي "أوجاع نفسية" أعراضها أوجاع جسدية،  
بس علاجها في نفسيّتك.

ولو حد قالك أنت اللي عامل في نفسك كده  
متصدقوش، بس أنت دورك تحمي نفسيّتك من  
الأشخاص اللي بتتعبها وكده هتكون خفت وجعها  
وحاميتها..

## "العلاج في إيدك"

طیب از اااااای؟!!

أول حاجه لسااااااااك ده هو السبب في أي إحساس  
أو أى شعور عندك..!

## ازای؟!!

أنت دلوقتی متضایق صح؟ زعلان؟ حزین؟!

شاهان طرب را با او فرحان بنفسك و أنت بتوصف  
مشاعرك!

معلش اعذرني لو حسيتنى بتعصب عليك!

بس استنی ہفہمک....!

## "أحكم في أفكارك!"

جربت في عز حزنك ده بدل ما تقول أنا حزين تقول  
أنا فرحان.. كل حاجة هتبقى تمام، لعله خير، قدّر الله  
وما شاء فعل.. الحمد لله؟!

على حسب المشكلة الي عندك!

أكيد لو فقدت حد غالي عندك مش هتقول أنا فرحان!  
ولكن أقصد إنك متسمعش مخك أى كلام سلبي  
يزود الحزن حزين... وصلت؟!

جربت بدل ما تقول الحياة ماشية معايا بالعكس تقول  
العبد في التفكير والرب في التدبير، الحمد لله، خير؟!  
مجربتش صح؟!



طيب ما تجرب.. أنت خسران إيه؟!  
 ماعلى رأيك هي خربانة خربانة...  
 ما تجرب مش هتخسر حاجة، مش جاوز تعمّر بعد  
 خراب دام كثير؟!  
 تنور بعد ضلمه دامت كثير!  
 تردد وأنت مقتنع... وعندك ثقة بالله.  
 مش تقول أنا فرحان أهو.. أديني بقول أهو..  
 مفرحتش ليه؟!  
 أنا كنت عارف إن مفيش فائدة!  
 "أنت حُر بقااااا!" وقت ما تبقى مستعد للتغير  
 ومصدق ابدأ...!  
 هقولكم على حاجة بعملها بتحكم بيها في أفكارى..  
 في مرة نويت إني كل ما ألاقى دماغي هتبدأ تتكلم

في حاجات هتتعب نفسيّتي هستغفر لحد ما الدوشة دي تسكت، وفعلاً.. كل ما دماغي يدور فيها أي أحداث قديمة.. موقف ضايقني.. حد عزيز فقدته.. أسئلة ملهاش إجابات بتتعبلي نفسيّتي، خصوصاً أنا وأنا قافلة بقي، يعني بعمل حاجة وأنا ساكتة، ماشية في الشارع، بتفرج على التلفزيون، بغسل المواعين.. تلاقي مخي جابلي أحداث حصلت من سنين ويلا دقت ساعة العمل، بقيت أول ما بحس بكده فوراً أقعد أستغفر.. أقرأ سورة الشرح.. أردد لا حول ولا قوة إلا بالله.. أعوذ بالله من الشيطان الرجيم.. لحد ما الدوشة دي تسككت.

مش من أول مرة هتجيب نتيجة، ولكن باليقين والثقة في الله والاستمرار..

## "حبك علاقاتك"

جربت تسبب حبك علاقاتك الي أنت دايماً شاده على  
الآخر ده؟!!

لدرجة إنه مجر جرك ورا كل حد بتقول عليه غالي..  
معلش أصله بيحبني.. ميقصدش يزعلني، معلش  
أصله زعلان مني عشان بيحبني ومتعشم فيا، معلش  
ميقصدش يجرحني بكلامه الي تعبلي نفسييتي وخلاقي  
أعيط لحد ما عيني ورمت وقلبي وجعني، بس معلش...  
هو بيحبني وميقصدش..

معلش هو زعل مني عشان مكنتش معاه وبيلومني  
بالتقصير...

مأنا لو مكنتش غالي عنده مكنتش زعل ولا حتى

أفتقد وجودي!

ما أنا بردوا مكنش يصح أعمل كده؟!

ہتعد تعلشہم کتیر!؟

طيب... أنت حد بيفكر يقولك معلى؟!!

لا اااااااااا مفیش!

أَيُّوهُ بَزْعَقُ مَفِيش... .

طيب تعالى هقنعك..

أنت محتاج حد معاك ولقيت نفسك لوحدك...

معلش كل واحد ليه ظروفه..

(بتمعلش نفسك بردو)!

أنت كلمت حد بكلام من قلبك بس مجاش على هواه

وزعل..

معلش.. ما أنا أتعصبت وعكيت في الكلام، أنا كده

كل ما بفتح بقى مع حد بعك الدنيا.

(بتمعلش نفسك بردو)!

اتحولت لحد بيتواجد بس خوفاً من إنه يتلام عليه  
بيضغط على نفسه بتصرفات وأفعال بس عشان يثبت..  
أنا كويس أهو.. جدع أهو..

هتجبوني وتفضلوا معايا ولا هتبعدوا بردو؟!

لأ..

هيبعدوا بردو..

إذا كان نفسك هانت عليك! مش هتهون عليهم!

## "مبتزّ علش"

بطل تبقى مبتزّ علش ..

لأ.. أنت بتزعل زيهم!

لأ.. عندك إحساس زيهم!

لأ.. عندك كرامة زيهم!

لأ.. بتعرف تدافع عن نفسك زيهم!

من حق نفسك عليك إنك تحميها.. ابعد عن أي حد  
هياذيها أو بياذيها..

بدل عند الناس مفهومهم عنك إنك مبتزّ علش ..

عشان بيدوسو عليك وبيسيبوك تتفلق ..

عشان أنت مبتزّ علش!

## "السم في لسانهم"

كام مرة قعدت تعيط لو حدك بسبب كلام اتوجهلك  
من حد، أو اتنقلك كلام اتقال عليك؟!

كام مرة قابلت الناس الي أقل ما يقال عنهم "السم في لسانهم"؟!

في ناس في حياتك هتلاقي عندها هواية إنهم يرموا كلام ومن غير ما يفكروا مدي تأثيره على غيرهم..

عارفين الناس الي في آخر كلامهم هتلاقيهم بيقولوا...

"معلش أصل اللي في قلبي على لساني"؟!

أههما دول الي جم في دماغك... أديك عرفتهم.

الناس دی بقي هتتحاسب علی وجعك ده...

ربنا طبّطبك عليك وقال في قوله الكريم: "واصبر على ما يقولون واهجرهم هجرًا جميلًا"

متسمعلهمش ولا تشغل بالك بيهم.. واتأكد إن ربنا هيتولى أمرك مش هيهون عليه وجع قلبك ودموعك.  
وهقولك على حاجة كمان ربنا قالك: "ولقد نعلم أنك يضيق صدرك بما يقولون فسبح بحمد ربك وكن من الساجدين"

كل حد جاب في سيرتك بكلام وجعك هيتحاسب.  
كل حد حاول يشوه صورتك.. هيتحاسب.  
كل حد وقع بينك وبين حد بكلام قاصد بيه يأذيك هيتحاسب.

أى حد قال عليك كلام مش فيك.. هيتحاسب.  
وكل أمرك لله.. وسامح.. وعيش حياتك.. واتأكد أن ربنا هيتولى أمرك.



## "مساعذك لغيرك مش فضل منك!"

هتقابل ناس في حياتك هيساعدوك في جزء واقع منك، أو أنت هتكون في الوقت ده محتاج المساعدة دي، سواء بيساعدوك بوقتهم أو بمجهودهم أو بفلوسهم... إلخ.

لدرجة إنهم بقوا شيء أساسي في حياتك في النقطة دي وخلاص اتأقلمت على وجودهم ودعمهم ومساعدتهم دي، وفجأة الشخص ده قرر يقلب عليك ويستكثر مساعدته دي ليك ويمنعها عنك.

مثال وللأسف منتشر بين أزواج كثير...

الزوج طبيعي هو اللي بيصرف على الأسرة كلها، وبما إنه المتحكم الأساسي في الفلوس، خصوصاً لو زوجته

مش بتشتغل ، وده بيكون نوعية من الأزواج الي بيربط المشاكل الشخصية ومتطلباته بمصرفه لزوجته أو قبوله لمتطلباتها عمومًا..

ضايقتني! طيب أنا مش هديها فلوس هي يعني  
مريحاني عشان أصرف عليها وأجيلها الي هي عاوزاه؟!  
لا مش هديها ويبتدي يستخسر فيها فلوسه ومجهوده  
ووقتہ.

للأسف الزوج في الحالة دي بيكون فاكر إنه بيأذيها  
هي، ولكن في الواقع هو بيأذي نفسه؛ لأن الرزق الي  
هو منعه عنها ده سواء من وقته أو مجهوده أو فلسه  
فده رزق زياااادة مبعوتلها من ربنا عن طريق زوجها،  
فبالتالي أنت استخسرت الرزق ده وفاكر إنه هيبكون  
ليك، فأنت غلطان؟!

لا، ربنا هیبعتلها نفس الرزق ده من خلال حد تاني

وهي مش هينقصها شيء، ولكن أنت اللي هتكون خسر ت كثير، وهكذا اااا قيسوا بقى ده على مواقف كثير.

فاعرف إن أي مساعدة أنت بتقدمها لأي شخص محتاج المساعدة دي سواء لقريب أو غريب بيكون ربنا مختارك لمساعدة الشخص ده، فملكش أبداً إنك تستخسر الرزق ده وتمنعه، ولا تحسبها بإن ده فضل منك، لأ ده رزق من عند ربنا باعتة للشخص ده بيك أو من غيرك هيوصله وأنت اللي هتختار تطلع كسبان أو خسران.

## "إيد لوحدها منسقفش"

طبعا كلنا عارفين إن إيد لوحدها منسقفش، تمام مش هختلف معاك في النقطة دي، ولكن محتاجة تغير نظرتك شوية للجملة، إيد لوحدها منسقفش.. وربنا خالقلنا اتنين مش إيد واحدة..

اسند نفسك بنفسك وقوم.. متستناش حد يقومك عشان مش هتلاقى.. ولو لاقيت هيكون بيساعدك بقناعاته الشخصية وبالطريقه اللي تناسبه مش اللي تناسبك، فبردو مش هتكون مرتاح.

أنت أدري حد بنفسك محدش هيفهمك غيرك.. متشيلش حد همك مهما كان مين!

مثال..

أنت متعود إن وأنت مثلاً بتخلع ضرسك حد لازم  
يكون معاك.. تمسك إيده بس، تحس بوجوده جانبك  
وجوده بيظمنك، وأنت أصلاً خوّاف...

يمكن دي قناعة معينة حد من أهلك غرسها فيك  
وخلاك تربط الأمان بشخص معين.

الشخص ده مش فاضي في التوقيت ده وأنت أصلاً  
موقف حياتك عليه وحاطط كل اعتمادك وأمانك فيه هو  
وبس، ولقيت إنه مش هيكون موجود!

ها هتعمل إيه؟!

(هزعل جدّاً منه إنه قصّر في حقي وخذلني وسابني  
لو حدي.. ومش هروح...!)

طب إيه رأيك إن ربنا هو اللي عمل كده عشان يعرفك  
إنك غني بس بالله، وإنك تقدر تعمل كل حاجة من غير  
أي حد،

جرب كده تروح تخلع ضرسك من غير الشخص ده  
وتمسك إيدك بإيدك الثانية... ها؟!

اليوم هيعدي وهتعرف إنك تقدر تعتمد على نفسك...  
ملحوظة..

الشخص ده مقصرش في حقك، أنت بس اللي محتاج  
تعرف إن نفسك أولى بيك وبس!  
مثال تاني..

المشوار ده مستحيل أروحه لوحدي، هخاف بقا..  
مش هكون مبسوط... إلخ.

طب اتحدى نفسك وروح لوحذك وادي فرصة  
لنفسك تعرف قدراتها، هتشوف الحياة مع نفسك بشكل  
جديد.

## "مذافعوش عن اللي ميستاهلوش!"

قبل ما تدافع عن حد.. اسأل نفسك!  
 الشخص ده يستاهل إنك تدافع عنه؟  
 ولا تخليك في منطقة الأمان أفضل؟!

حلو إنك تدافع عن شخص في غيابه وحضوره، لكن  
 للأسف في ناس متستاهلش إنك تدافع عنهم.

في ناس ممكن تغرقك وميهمهاش غير نفسها، تعمل  
 أنت عشر رجالة في بعض عشان تدافع عن شخص معين  
 وهو بكل سهولة يقلب الترابيزة عليك... بس عشان  
 مصلحته!

## "كل واحد أولى بمشاكله"

كأ مرة حصل قدامك مشادة بين شخصين منهم شخص يهملك إنه ميكونش متضايق؟!!

فيكون رد فعلك إنك تتحمق عشانه وتوصل لمشادة وخناق مع الشخص الثاني، في حين إن صاحبنا ده أصلاً ساكت وكل الناس الي قاعدة ساكتة، أنت بس الي خدتك الشهامة واتحمت.

طيب عارف إيه الي هيحصل..؟!!

هيتحرق دمك وهتضايق وهتخاصم الشخص ده.. وهتلاقي في الآخر الاتنين اتصالحوا وأنت الي هتكون في الآخر خسران راحة بالك وعملت مشكلة مع حد أصلاً مجاش جانبك.



أكثر ناس مرتاحة في حياتها هي الناس الي مش  
بتدخل نفسها في مشادات متخصهاش، دايمًا هتلاقي  
شعارهم في الحياة وأنا مالي، أنا مبحبش أوجع دماغي...  
مثال..

حصل مشادة بين إخوانك وحد فيهم زعل الثاني أو  
جرحه بالكلام، في حين إن لما حصل نفس الموقف قبل  
كده وأنت اتدخلت اتقابلت بقله ذوق وإسلوب حرق  
دمك، وخلاص تندم إنك اتدخلت من البداية، في حين  
إنهم في الآخر اتصالحوا وأنت الي زعلت واتحرق دمك.  
يبقى قدامك حل من الاتنين..

يا تسمع من هنا وتفوت من هنا ولا كأنك سامع  
حاجة، أو تقوم وتسبب المكان خالص.  
نفسك ليها حق عليك بإنك تحميها من أي حاجة  
هتسبيلها أثر سلبي.

## "خانة الأمان"

بطل تقول لااااا ده مستحيل يعمل كده، ده طيب..  
ده بيحبني.. ده كان بيتكلم عادي.. ده ميقصدش يوقع  
بيننا!

توقع أي حاجة من أي حد..  
حط نفسك في خانة الأمان..

كلنا بشر مفيش ملايكة عايشين معانا..  
بس هقولك على حاجة..

مش معنى إنك شخص جواك طيب.. يبقى الي  
بتعامل معاه طيب وبتعامل بطيبة، ومستحيل يعمل  
الحاجات الي أنت مستحيل تعملها! عشان أنت طيب!

كثير بنسمع كلمة أنا أول ما بتعرّف على حد وبرتاحله  
بحكيه كل تفاصيل حياتي، وبعد مرور الوقت ويحصل  
خلاف فتلاقي الشخص ده فجأة بقى ضدك، وممكن  
تسمع إنه اتكلم عليك من وراك في كلام كان المفروض  
سر بينكوا!

تيجي أنت تسأل ليه وازاي؟!

بس أحب أقولك إن الغلط مش في الشخص ده...  
الغلط في اللي مداش مساحة أمان لنفسه..

وأداله التصريح أنه يعمل كده!

مش معنى إن نيتك خير وعایش دور حمامة السلام،  
يبقى اللي بتتعامل معاه ماشي بنفس المبدأ...

لأ.. متتعش مش زيادة، ودايمًا تبرر تصرفات غيرك  
إنهم نيتهم خير بمجرد إن نيتك خير!

أوقات ممكن تبذل مجهود نفسي وبدني من أجل

شخص معين، في حين إن الشخص ده عنده سوء ظن  
بتصرفاتك دي!

وبالتالي رد فعله تجاهك هيكون نابع من سوء ظنه  
فيك، فالنتيجة هتكون صدمة بالنسبالك!

ده أنا كان نيتي خير! ازاي حصل كده؟!

مش بلومك على حسن ظنك بالناس.. ولكن بلومك  
على عشمك الزيادة!

بلومك إنك بتيجي على نفسك عشان تسعد غيرك..  
لأ... خليك في الطبيعي!

أقولك... خليك زيه!

اتصرف بنفس طريقته معاك.. متبالغش في الجدعنة  
عشان نفسك تفضل في خانة الأمان، ومتديش فرصة  
لحد إنه يخدشها

بتصرّيح منك!

## "بطلّ نبيجي على نفسك"

بلاش جو شمعة تحترق لأجل الآخرين دي...

خليك شمعة آه!

تنور لنفسك وللناس... ولكن الي يفكر يطفئها  
تحرّقه فوراً!

متسمحش لحديطفك!...

**"أنت أهم حد في حياتك"**

## هنقول ڪهڻ..

سيب الي عاوزيز عل منك يتفلق طالما أنت مغلطتش ..  
متقعدش تجلد في ذاتك ..

ولا.. لا انا ازم أصاااالحه، ومبحبش حد يزعل مني!!  
طب ما هو لو مكانش بيحبنى مكنتش هفرق معاه..  
ولا كان هيزعل منى.

لأ.. طالما أنت مش غلطاً انا..

# یہ قی متفکرش!

## "أنا الست حشورة بحشر حالي في كل شيء"

بطل تتكسف تكسف غيرك؛ لأن غيرك مترددش  
لحظه أنه يكسفك...

هحكيلكوا موقف حصليّ على الـ "Account" بتاعي..  
Comment جالي على شكل باب شقتي إنه مش  
نضيف... الـ "Comment" يقول:

"ما تنضيفي الباب الأول!"

قرأت الـ "Comment" وجه في دماغي كل شخص  
قصد يجرجني أو يجرحني بكلامه وأنا مردتش عليه...  
أنا من خلال الفيديو الي نزلته ده رديت على كل  
شخص جرحني بكلمة في يوم من الأيام...

وخذت حقي تالت وملتت..!  
 وبعض الناس كمان دخلت تأيد كلامي في الـ  
 Comments""

وفي بعض السيدات اتعرضوا وبيتعرضوا لنفس  
 الانتقادات قالولي بالنص:  
 "أنتِ شفيتِ غليلنا"

اللي هيشوف الموضوع من بره هيعتبره مجرد فيديو بيرد  
 على Comment!

ولكن ده كان تراكمات جوايا لناس كثير أدوا نفسهم  
 الحق يتدخلوا في تفاصيل متخصهمش...

كثير في حياتنا ناس بجد محتاجين نوقفهم...  
 هما مولودين بأوبشن اسمه "أنا الست حشورة بحشر  
 حالي بكل شيء"



بتهم دخلت ثانوي عام ولا لا.. طب دخل علمي  
ولا أدبي؟!

علمي علوم بقا ولا علمي رياضة؟!  
آه دي بترسم إنها تطلع دكتورة.. آه طول عمرها  
دحيحة...

شايلين هم دي بيتها عامل ازاي.. دي جوزها بيعاملها  
ازاي.. بتفطر جوزها قبل ما يروح الشغل ولا لا..  
مهمتة بنضافة أولادها ولا لا.. بتشتغل ولا لا..  
بتقبض كام.. مخلفوش لحد دلوقتي ليه.. ولو خلفوا إيه  
ده ما لهم جابوا

العيال ورا بعض ليه كده؟! صد اااااااااا  
نيجي بقا لحياتهم... هتلاقيهم أكثر ناس قافلة على  
نفسها وعلى أولادها... احنا آه نتدخل في حياة الناس  
لكن منحبش حد يعرف حاجة عننا!

## "منسمحش لحد يشكك في نفسك!"

متسمحش لحد يشكك في نفسك قبل ما تاخذ رأي  
حد فكر الأول..

هل الشخص ده بيحبك؟!

بيتمنالك الخير؟!

عاوزك فعلاً تنجح وتكمل وتحقق حلمك؟!

طب مقتنع بكلامك؟!

فاهم في المجال ده ونجح فيه قبلك..

قبل ما تتأثر برأي حد فيك أو في تصرفاتك أو أفعالك  
وقناعاتك الشخصية...

لازم تعرف وعيه.. وأفكاره.. وقناعاته.. ودراسته...

ربنا قالك: "فاسألوا أهل الذكر إن كنتم لا تعلمون"  
كل شخص ناجح في حاجة معينة فهو أهل ذكر فيها،  
فمش أي حد هيفيدك وهينورك طريقك...

مش تبقى بتتكلم مع حد عن أهمية إن البنت لازم  
تشتغل أو تكمل دراستها، وهو شايف إن البنت  
مستقبلها في الجواز وبس.. ماشي بمبدأ الست ملهاش  
غير بيتها وجوزها!

طبعي هيبقى شايف إن كل اللي بتعمله مفيهوش أي  
إنجاز!

## الباب الثاني "موروثات اجتماعيّة"

الناس بتحب تشوف تصرفاتك على مقاس عاداتهم  
وتقاليدهم..

بترتاح نفسيّا كده..!

اللى هو ده مجتمعا ودي عاداتنا وتقاليدنا وموروثات  
طالعين عليها من جدود جدودنا..

مش هتيجي أنت تغير الكون على مزاجك!

ولو دخلت في جدال معاهم هتبقى شخص عنيد  
وبتقاوح كلامهم الصبح الي لازم تمشي عليه بدون أي  
نقاااش!

زي مثلاً..

## "النفاق الاجتماعي"

في عادة كده عند بعض الناس اسمها (النقطة)..  
إن حد يروح لحد خطب.. متجوز جديد.. مخلف..  
مريض.. جاي من عمره أو حج..  
يروح ينقطه بفلوس... أو يهاديه بهدية.  
أنا بختلف كتفكير في الموضوع ده ومتعارضة معاه  
تمامًا!

لأن الموضوع اتحول من صلة رحم أو محبة وصداقة  
لنفاق اجتماعي... أيوه نفاق اجتماعي!

## "جمعية ودائرة يا ريس"

تبقى واحدة جايبة طفل جديد وتلاقي حد داخل  
يزورها خمس دقائق كده بظبط، يكرمشلها بضعة جنيهات  
في إيدها ولا في ظرف.. ويلا أنا عملت الواجب سلام  
بقى!

\*\*\*

حد متجوز جديد.. لازم نروحله ده ليه عندنا نقطة  
لازم تترد، مع إني مش عاوز أروح بس ميصحش  
عيب.. الناس تقول كلنا نقطتها؟!!

\*\*\*

فلان هيخطب.. لا ياعم مش هروحله آخر مرة كنت  
منقطة ومجاش ردهالي!..!

\*\*\*

فلان جه من عمرة.. هتروحله؟!  
لا ياعم ملهوش نقطة عندي ده أنا اللي ليه!

\*\*\*

الموضوع اتحول من محبة وإهداء وخير لجمعية ودائرة  
يا ريس!

لازم أنت بقى تفضل رايح مع الرايحين وجاي مع  
الجايين عشان تكسب لقب "صاحب واجب"



## "جيل التسعينات والألقاب الاجتماعية"

خلينا متفقين إن أي حد من جيل التسعينات الزمن وقف بيه عند ١٧ سنة معروفة..

فطبيعي لما يقابل حد طولله وبيقوله يا عمو أو يا طنط هتلاقيه اتحول.. ما مش من المنطق إنك تخبطهاله كده مرة واحدة طب مهدهاله طيب.

خلينا متفقين بردو إن في ناس بتحب جدًّا الألقاب وناس العكس، فببساطة لقيت اللي قدامك مش متقبل إنك تحطله قبل اسمه طنط وعمو يبقى تحترم الرغبة دى بدون أي سخرية.

نيجي بقا للأسوأ.. تلاقي بنوتة عندها ١٩ سنة واتجوزت ومعاها طفل.. فجأة تنام وتصحى تلاقيهم

غيروا اسمها الي طول عمرها عايشة بيه .. أم أحمد..  
أم محمد.. أم بتنجان.. إلخ.

نعم؟ فين ضميرك وأنت بتنادي عليها كده.. هترد  
وتقولي عيب أناديها باسمها.. طيب يبقى متناديهاش  
وريح نفسك وريح البشرية من معتقداتك..

لما تستوعب ان اسم البنت مش عيب يتعرف وإن  
الرسول (صلى الله عليه وسلم) ذكر اسم زوجاته بدون  
ما يخيبها..

ولما الرسول (صلى الله عليه وسلم) اتسأل مين أحب  
الناس إليك.. قال عائشة، مقالش زوجتي مخباش  
اسمها.. فمين حضرتك عشان تخبي اسم بنت عشان  
شايف إنه عيب.. والله عيب.. لازم تفهم إن دي كلها  
عادات وتقاليد خاطئة ومعتقدات موروثة ليس لها  
أساس من الصحة.

## "بص للأقل منك"

في مقولة دايماً بتتكرر من بعض الناس ودي بتعتبر  
قناعة شخصية عندهم بتتورث من جيل لجيل وهي ..

متبصش على اللي أعلى منك عشان متتبطرش على  
عيشتك، أو.. اللي يبص لعيشة غيره تحرم عليه عيشته..  
طيب.. حاضر.. تمام..!

ما طبعي محدش يبص لعيشة حد وكل شخص يبقى  
راضي بحاله ماشي مش معترضين!

لكن متجيش تقول بص للأقل منك عشان تحمد ربنا  
على حالك!

طيب ماشي ما أنا بحمد ربنا وراضي! لكن ليه أبص

للاقل مني؟!

طيب قولي ساعدهم.. أقف جانبهم.. أتمنى تبقى في ظروف أحسن عشان تساعدهم أكثر..

لكن أبصلهم وأفضل مكاني بس عشان في ناس أقل مني وعايشة وراضية!  
فلأ.. أختلف معاك..

مش غلط إن الواحد يسعى إنه يطور من نفسه..  
مش عيب إنه يسعى للتحسين من نفسه سواء تحسين مادي أو دراسي أو حتى في علاقاته الشخصية والاجتماعية..

السعي للتحسين ملهوش علاقة بعدم الرضا!  
مش معنى إنك ماشي بالمبدأ ده وثابت على حالك تبقى كده ماشي صح!

في فرق بين واحد عايش راضي وبيحمد ربنا..  
 وواحد عايش "ناجح وراضي" وبيحمد ربنا بردو!  
 وصلت؟!

## " ما أنتِ قوِيّةٌ وعِدتيّ بالأصعب "

أنتِ مالِك؟! ما أنتِ قوِيّةٌ وعِدتيّ بالأصعب!  
من وجهة نظركِ إن الي كان بيمر بظرف معين في  
وقت من الأوقات كان أصعب من الي بيمر به حالياً!  
من وجهة نظري مفيش مقارنة أصلاً بين أي شدة  
مریت وبتمر وهتمر بيها..

في شدائد أصلاً مينفعش تدخل في مقارنة زي  
الفقدان.. لما بيتوفى شخص عزيز عليك..

مفيش مقارنة!

مثال..

حد تعب في يوم من الأيام بمرض مزمن وكان عنده

إرادة والناس شايفاه قوي وعافر لحد ما خف.. نفس  
الشخص ده فقد حد غالي من أهله.. فالشعور هيمختلف  
إرادته، نفسيته، تقبله للحدث.. فمش طبيعي إننا نقارن  
شدة مرضه بشده فقدانه لشخص غالي.

أي شدة كانت مع أشخاص مختلفة.. بظروف مختلفة..  
بتساعد الشخص يكون أقوى..

ثانية واحدة بس.. جربت بدل ما تقول للي قدامك  
الكلمتين دول..

تساعده إنه يبقى أحسن ويتجاوز محنته؟  
ولا أنت شايف إيه؟!!

## "خرجتِ عن الملة"

أنتِ خرجتِ عن الملة..

جملة من الجمل الي سمعتها.. أيوه اتقالتلي بالنص  
كده!

"أنتِ خرجتِ عن الملة!"

بمجرد إن الي قدامي معترض من تصرف معين ضد  
قناعاته الشخصية أو الأسرية، أو تصرفات معينة ضد  
عاداته وتقاليده.. أبقى بالنسبale خرجت عن الملة!

ولكن الكلمة دي استوقفتني..

لأنها اتقالت من حد يهمني رأيه.. ويهمني يبقى  
فاهمني ومقتنع بالي أنا بعمله، وكمأن التفكير في الجملة



نفسها وتحليلها..

الجملة بتلخص تفكير أغلب اللي حوالينا في إننا لما  
بنعمل حاجة عكس قناعاتهم وأفكارهم وعاداتهم  
وتقاليدهم يبقى كده خرجونا خلاص من ملتهم!

## "مصدر دعمهم الأول"

في حين إن لو حد غريب عنهم هو الي عمل كده  
يسقفوله وبيمدحوا فيه وبيدعموه كمان!

طب نتق في قدرات الي مننا شوية؟!

نبطل نحبط فيهم.. نسيبهم ينطلقوا وييدعوا ويقدموا  
أحسن ما عندهم.. فكوا قيودهم الي بتربطوهم فيها  
بكلامكوا.. كلمة واحدة كفيلة تدمر لهم كل شيء..  
وكلمة ممكن ترفعهم لسابع سما..

عارفين ليه؟! ومنكوا أنتوا مخصوص؟!!

لأنكم مصدر دعمهم الأول.. لكن للأسف بيلاقوا  
الدعم من الغريب مش القريب..

## "وقت النجاح"

تعالوا بقى وقت النجاح.. هتلاقيهم انقسموا لقسمين!  
قسم بيتابعك من بعيد.. وقسم وقف يسقفلك ويقولك  
"Bravo!"

"Bravo!?"

طب ما كالأنا من الأول!

"Bravo" منك دلوقتي ملهاش طعم ولا تأثير خالص..  
"Bravo" دي كان محتاجها منك لما كان مش لاقى حد  
يقولهاله..

بس دلوقتي هو نجح وحقق ولقى ألف غريب أقرب  
منك ليه..

وقاله "Bravo" .. كمل .. بنحبك .. وبنستناك .. هتكسر  
الدنيا.

ممتنة جدًّا لكل حد كان بيؤمن بيا ومصداق حلمي  
شكرًا ..

## الباب الثالث "رسايل ربنا لبنا"

مفيش حاجة في حياتنا بتحصل صدفة..

كل حاجة بتكون بترتيبات ربنا ليك.. دايمًا ربنا  
شايفك وحاسس بيك..

كثير في حياتك هتقابل ناس بتفكير وقناعات ووعي  
وعادات وتقاليد مختلفة عنك.. فغالبًا بتقابل انتقادات  
كثير وتنمر واعتراض لتصرفاتك وأفعالك وقدراتك  
وأسلوب حياتك تخليك كل شوية تسأل نفسك.. مين  
الصح أنا ولا هما؟!

هقولك إنك هتلاقي ربنا بيضطرب عليك ويقولك  
أنا جانبك أنت صح كمل..

لما تلاقي نفسك بتعمل حاجة في قدر استطاعتك  
وطاقتك، متزعلش لو حد قلل منها وحاول يبطك،  
وحسبك إنك بتنفخ في بالونة مخرومة مثلاً!

او عى تسمح لحد يوقفك عن تحقيق حلمك..  
مهما كنت بتقدم شيء بسيط بس في النهاية أنت بتقدم  
وبتسعى في حين إن الي بيحبطك ده قاعد بس بيتفرج!

## "التفاق الاجتماعي"

مبدئيًّا كده أنا حد انطوائي جدًّا.. مش اجتماعية  
بالمرة..

عارفين الشخص الي لما حد يشوفه ويتعامل معاه  
لأول مرة يقول ده تنك!..  
أيوه أنا نفس ذات الشخص ده..

عارفين بقى الشخص الي كانوا فاكرينه تنك وبعد ما  
اتعاملوا معاه قالوا إنه طلع كويس وكنا فاهمينك غلط!  
أنا بردو نفس ذات الشخص ده!

دايرة معارفي محدودة جدًّا.. لما بمشي في الشارع ولا  
ببص يمين ولا شمال..



مليش علاقة بحد معروفش.. يعني جو السلامة  
 هنا وهناك لأي حد أقابله ماليش فيه..  
 بعتبره نفاق اجتماعي مبعرفش ومبحبش أعمله..  
 عارفك شخصيًا هسلم عليك لأني عاوزه أسلم..  
 غير كده أنا مش مضطرة أتعامل مع حد معرفهوش.

## "موقف حصّلي"

الموقف الي هحكيه ده عكس كل الكلام الي كنت بقوله ده..

الموضوع بدأ وأنا بَوَدِّي بنتي نور المدرسة (أيوه اسمها زي اسمي).

في راجل كان قاعد قدام المدرسة بيع ستيكرات كان عارض بازل شكله شدي فوقفت اسأله على السعر..

رد قالي... البازل ب ٢ ونص بس بيبوظ بسرعة!

وفي ده أنا الي عامله (هو الي مصمم البازل) ب ٥ جنيه.

بداية حوارنا كان عن ورقة مقطوعة كان كاتب فيها

جملة وأدّاها لواحدة واقفة تشتري منه، راحت مقطّعاها واستهزقت بكلامه فيها... جالي فضول أعرف الي مكتوب في الورقة، وكان المكتوب كالتالي.. (المهارات: الصبر - والإحساس - محاولة التدريب - والاستمرار).

## "نسويّف بشكل مختلف"

الشخص ده مكانش بس بيعع ستيكرات لأ..  
 بيعع حاجات مصنّعها بنفسه، ولما سألته على حصّالة  
 عارضها لقيته بيقولي:  
 الحصّالة ب ٣٥ بس مش للبيع! وإنه بيعع موادها  
 الخام وتحلي ابنك يجمعها بنفسه في البيت.  
 هدفه إنك تتشاركي مع أطفالك والسبب الثاني أن  
 الطفل ميقولش كلمة أنا مش بعرف..  
 لأ.. يقول أنا هحاول وأجرب وأشغل دماغي  
 وهعرف.

## "جبر الخواطر"

نرجع للورقة المقطوعة الي كان كاتبها عشان بيحاول  
يوصل فكرة معينة، ولكن اتقابل بالرفض والسخرية  
وكسر الخاطر!

فقررت أجبر بخاطره وأحتفظ بالورقة دي ومكتش  
أعرف إن وقفتي معاه كانت جبران خاطر من ربنا ليا  
أنا..

أنا عندي قناعة معينة إني عندي استعداد أسمع الي  
قدامي ساعة وساعتين وثلاثة وأنا عارفة إني في الآخر  
هستفيد بمعلومة جديدة.

أتفرج على فيديو مدته طويلة بس عشان أكتسب  
معلومة واحدة جديدة.. وده الي حصل معاه.

## "مناخدوش بالظاهر"

في حين إني واقفة من البداية ومكنش في نيتي إن في كلام مهم هسمعه من حد مثقف مش مجرد بيع الرصيف

أكتشفت أنه كان بيشتغل مدرس وطلع معاش!

مدخلتش في تفاصيل عن الظروف اللي وصلته إنه يكون في المكان ده حاليًا، من زاوية بعيدة هو شخص بسيط ممكن تقف تشتري منه ولكن مستحيل تدخل معاه في نقاش مدته ساعتين وكم إن تستفيد منه!

من زاوية قريبة هو مدرس طالع معاش.. مثقف.. خلاق.. يفكر بهدوء.. كلامه مهذب جدًّا..

عنده بنت خريجة كليه آداب قسم اجتماع.. وبيحوش فلوس عشان تاخذ الماجستير..

استفدت كثير من كلامه ونتيجة وقفتي معاه مكانتش بس مجرد معلومة اكتسبتها، لأ.. ده كمان كان ربنا مسخري الشخص ده بإنه بيعتلي رسائل معاه.

في نهاية حوارنا لقيته بيديني جريدة عشان أقرأ مقالة معينة فيها، واداني جريدة تانية وقال لي وقلبي في دي كمان يمكن تلاقي حاجة تقابلك تقرأها، وطلب مني أقرأهم وأرجعهم له تاني واداني شنطة أحفظ بالجرايد فيها عشان متبهدلش.

في البداية كنت مستغربة لإني أصلاً عمري ما كنت بقرأ جرايد ولكن أنا عندي قناعة مهمة جداً وهي إن مفيش حاجة بتحصل صدفة..

وكنت مقتنعة تماماً إني على الأقل في رسالة واحدة ليا من ربنا من خلال الشخص ده..

وفعلًا فتحت الجرايد صفحة صفحة ولقيت بدل

الرسالة رسايل، ومكانتش رسايل لأ، دي كانت طبطبة  
من عند ربنا ليا و كإن ربنا بيقولي..  
كملي.. أنا حاسس بيكِ ومعاكِ.



## "الاغتراب النفسي"

أول مقالة قرأتها كانت اسمها الاغتراب النفسي.. كانت بتتكلم عن الانتحار، وذكرت في المقالة جملة "نحن أمام حالات لشباب وفتيات أقدموا على ذلك"، رغم تأكيد أقاربهم وأصدقائهم إنهم لم يكن لديهم أسباب قوية تدفعهم للانتحار أو حتى تنبؤ بذلك.

مبدئياً كده حطولي ١٠٠ خط تحت كلمة "بيأكدوا!!!!!" دي، أقاربهم وأصدقائهم مش بس بيقولوا إن الشخص ده كان مش باين عليه الزعل..

لأ دول بيأكدوا!!!!!!

ها؟

أديهم انتحروا!

اللي كانوا ييحاولوا يتعايشوا مع الحياة ومع وجعهم  
المستخبي ومع ضغط الناس دي عليهم..

شايفين واحد لابس كويس.. بيخرج.. بيتصور..  
بيضحك..

إيه ده؟!

طب ما هو بيتفسح أهو وفرحان وعایش حياته ولا  
باين عليه زعل ولا تعب!

وفجأة الشخص ده انتحر!

إيه ده؟!

ده مكانش باين عليه خالص..!

غريبة!

الناس دي للأسف بتوظف نفسها كده إنها بس عايشة

عشان تحكم على الناس..

لما يقابلوا شخص يمر بأزمة معينة في حياته يبصوا  
للأزمة دي من "طريقة تفكيرهم.. ووعيهم.. وتصرفاتهم  
ومن هنا هتلاقىهم بيصدروا بقى حكمهم على الموقف  
ومدى تأثره بيه، فمجرد ما يلاقوا شخص مش بيظهر  
أصلاً إنه متضايق.. فيلا بينا نضغطة أكثر.. ما هو كويس  
بقا!

الناس دي بتكون هم فوق الهم بجد..

## "رسالة للناس اللي بنحكم على غيرها"

أنت مين في الحياة عشان تحكم على حد إذا كان الموقف  
اللي هو بيمر بيه ممكن يآثر على نفسيته ولا لأ لدرجة أنه  
ينتحر!

بتأكد حكمك ده على أي أساس؟!

خصوصاً لو الشخص ده مش بيظهر أصلاً زعله ده!  
كثير في حياتك بتقابل ناس مش بتبين أصلاً حزنها، في  
حين أنهم ممكن يكونوا بيتدمروا من جواهرهم بس راضيين  
وبيتعايشوا، لكن للأسف بيواجهوا ضغوطات كثير على  
قد صبرهم ده.

كل شخص بيزودهم الناس بقصد أو بدون قصد  
بحجة إنه مكانش باين عليه، أو إن الظرف اللي بيمر بيه

ميسـتاهـلش الزعل ده.. أو ما كل الناس بيحصلها كده  
أنت مش أول واحد يعني!

كل شخص اتأذى بسبب حتى كلمة منكم.. نصيحة  
مني.. يا تسيبوا الناس في حالها.. يا تساعـدوهم!

مش عارفين تساعـدوهم.. سيـبـوهم في حالهم..

متحكمـوش عليهم لا بالإيجاب ولا بالسلب.. كل  
واحد فيه اللي مكفيه وربنا عالم ما في القلوب، مش لازم  
الشخص ده يتعب ويرقد في السرير ولا يموت عشان  
تصدقوا إنه كان مكتـب!

كل واحد فينا ليه نسبة تحمل مختلفة عن الثاني.. كل  
واحد فينا بيعالج الأمور بشكل مختلف عن غيره، ومش  
معنى إنك كشخص قادر تعالج أمر بشكل معين أو  
تخطئ حزنك وتكمل، أو حتى تيجي على نفسك..

يبقى تلزم غيرك بأنه لازم يتصرف بنفس طريقتك!

ونوع ثاني من الناس بتكون مش قادرة تعالج أمورها بالشكل اللي يساعدها إنها تتجاوز حزنها، فتلاقيها بتلزم غيرها بنصايح معينة لازم تتبعها في حين إنها أصلاً معرفتش تعمل ده كإنها شايفة نفسها قدامها وبتكلمها! والنوعين دول من أكثر العلاقات المؤذية في الحياة.

فإذا صادفك في يوم شخص أظلمت في عينه حياته، وضعفت قواه النفسية عن المقاومة، فلا تبحث عن وجوده المادي فهو لا يعنيه..

بل أبحث معاه عن وجود معنوي يرضيه، وحطلي ١٠٠ خط تحت كلمة يرضيه.. يرضيه هو ها.. مش يرضيك أنت، كل حد فينا من حقه ياخذ وقته ويتعافى بالطريقة اللي ترضيه.

## "بلد العميان"

المقالة دي كانت بتتكلم عن مرض انتشر في قرية معزولة عن العالم في جبال الإنديز، فأصاب سكان القرية بالعمى بالرغم من كده أهل القرية تأقلموا على العمى، وكم إن جابوا أطفال عندهم نفس المرض، والعمى توارث من أجيال لأجيال على مدار السنين.

وفي يوم شخص اسمه "نيونز" بيمارس هوايته وهي إنه بيتسلق الجبال.. وفي وقت تسلقه وقع في القرية دي!

كانت أول حاجة تلفت نظره إن البيوت مفيهاش حوائط ولا شبابيك، وألوان القرية كانت فوضوية وصارخة، مش عارفة يعني إيه صارخة، بس هما كانوا كاتبينها كده، فكان تعليقه إن أكيد اللي عمل البيوت دي

شخص أعمى، ولاحظ إنه بالرغم من إنه ماشي وسط ناس كثير ولكن محدش فيهم التفت حتى ليه، فاستوعب إنه في بلد العميان، وبدأ يتكلم مع الناس عن حكايته وسبب وجوده في قريتهم، وإنه مش أعمى وعاش في مكان مفيهوش حد أعمى، الناس استغربت جدًّا وبدأت تسأله يعني إيه أصلاً شخص عنده نظر؟!!

مش بس كده! كان في سخرية من أهل القرية وضحكوا عليه واتهموه بالجنون كمان، وفي منهم قرر إنه ياخذ نظره ويعميه لأنهم اعتبروا إن نظره هو سبب جنونه!

للأسف "نيونز" منجحش في إنه يشرح معنى النظر لكل شخص فيهم فاقد النظر، فهرب قبل ما يفقدوا له نظره! وسأل نفسه...

"كيف يصبح العمي صحيحًا.. بينما يصبح البصر مرضاً؟!"



وقال .. "إن ما يمكن استخلاصه من القصة أن بلد العميان هي كل مجتمع يسوده الجهل والفوضى والفساد والتخلف والفقر والعنف والتعصب؛ بسبب أفكار غير صالحة ومهيمنة عليه، حيث أي دعوة تنويرية تواجه برفض وريبة وعنف."

وأهمهم "يسعون لنشر الأعتام الفكري في كل أرض يحلون بها"...  
وأخيراً...

متحاولوش تقنعوا حد بوجهة نظركم أو قناعة شخصية عندكم، كل حد ليه قناعاته الشخصية، فلو ١٠٠ .. ٢٠٠ .. ١٠٠٠ .. يفكروا بطريقة وأنت بتفكر بطريقة مختلفة عنهم، فأكيد مش هتقعد تقنعهم كلهم بطريقتك!

أنت كشخص استمد طاقتك من ربنا.. اثبت واستمر

بقناعاتك وأسلوب حياتك الي مقتنع بيه، أنت مش مجبر  
إنك تحلي حد يبص للأمور بنفس نظرتك.. وفي الآخر  
أنت ليك حياتك وهما ليهم حياتهم.

## "رسالة من إنسان سعيد"

المقالة دي بتتكلّم عن شخص بيحكى إن ربنا رزقه بطفل، وفي الوقت اللي الطفل تم فيه ٤٠ يوم من عمره، وأثناء عملية الختان الطفل كان بينزف بشكل مبالغ فيه، لدرجة إنه فقد الوعي، فنقلوه على المستشفى واتضح إن الولد مريض بمرض نادر اسمه "الهيموفيليا" وهو مرض يخلو فيه دم الإنسان من "الهيموجلوبين" وده بيؤدي لتجلط الدم، ومع كل جرح بسيط بينزف لحد ما يتحقن بالهيموجلوبين..

يقال إنه مرض وراثي وملهوش علاج، بيلازم الإنسان لآخر العمر.

وكانت أول مشكلة بيواجهها الطفل إنه ممنوع من

تطعيمات الأطفال الأساسية، مرت سنين وكل ما الطفل يكبر كان قلق الأم والأب بيزيد، ولما الطفل تم ٦ سنين اتعرض ضرر من ضرره للتسوس وكان لازم يخلعه، الموضوع بالنسبة لأي طفل سهل ولكن بالنسبة للطفل ده الموضوع كان مختلف، فلهيحتاج يتحقن بالهيموجلوبين قبل العملية.. آه في حالته هتكون عملية مش مجرد خلع ضرر.

أثناء التحاليل الخاصة بإجراءات العملية لقياس سرعة تجلط الدم وسرعة النزف، وكانت المفاجأة! إن التحاليل طلعت سليمة تمامًا وإن الطفل طبيعي خالي من أي مرض!

وخلع ضرره وكان الطفل طبيعي كأى طفل ويمكن نزيفه أقل من أى طفل طبيعي كمان!

وقال الأب في الرسالة "لا تيأسوا من رحمة الله.. إن الله

على كل شيء قدير.. وما أوتيتم بالعلم إلا قليلاً فاصبروا  
وابشروا ففرج الله قريب.. إن فرج الله قريب."

رسالة بقا أخيرة كانت مكتوبة في المقالة لكاتب  
الرسالة: مش صدفة إني أقرأها ولا صدفة بردو إنك  
تكون بتقرأها دلوقتي، اعتبرها رسالة من ربنا ليك..

"يا صديقي لقد عانيت في حياتك آلاماً حقيقية، فلتكن  
سعادتك أيضاً حقيقية، ولتدم لك هذه السعادة".

"وإن رسالتك هذه هي أبلغ رد على من يستسهلون  
الشكوى من كل شيء، ومن ينظرون إلى الدنيا بمنظار  
أسود ويتأففون من كل شيء رغم تفاهة متاعبهم، إذ  
يبدوا أنه لا يعرف قيمة السعادة إلا من كابد جحيم  
العذاب."

الرسالة دي كانت في سنة ١٩٨٣! فأکید مش صدفة  
إنها توصلك دلوقتي..

## "الطائر الطنان"

نيجي بقااااا للمقالة اللي كانت السبب في إني امسك  
الجريدة دي، وإني يوصلني كل الطبطبة الي من عند ربنا  
دي..

دي المقالة الي الراجل حددهالي إني أقرأها!  
مش عارفة اشمعنا أنا بالذات الي هذالي الجريدة دي  
والمقالة دي بعينها؟!

ولكن حقيقي مهما كان حوائك ضغوطات، ومهما كنت تايه ومش عارف أنت صح ولا لا، خليّ عندك يقين إن ربنا جانبك وهيدلّك على الخير.. "العبد في التفكير والرب في التدبير".

القصة بتحكي عن طائر صغير اسمه "الطائر الطنان"

يقال إن حجمه قد النحلة، اسمه كناية عن سرعته وإنه قادر يطير ٨٠ خفقة في الثانية، وكأن عنده القدرة إنه يطير للخلف، سرعة جناحاته بتساعده إنه يفضل متعلق في الهواء فترة طويلة ودي حالة استثنائية بين الطيور.

الحكاية بقا بدأت من حريقة في الغابة..

ففكر "الطائر الطنان" إنه يملا منقاره بالمّيّه ويطير بسرعة يطفى النار بالمّيّه من منقاره، ويرجع تاني يكرر نفس الموضوع..

مش دي المشكلة!

المشكلة كانت في "الحيوانات اللي في الغابة وتنمرهم عليه في إنه بيحاول يطفى الحريق بمنقاره الصغير، من ضمنهم الفيل اللي بسهولة كده كان ممكن يطفى النار، في حين إنهم واقفين من بعيد يتفرجوا من غير أي مساعدة!

مش بس كده كانوا بيتريقوا على "الطائر الطنان" وكأن

وجھوله انتقادات وقالوله إن كل الي هو بيعمله مش  
هيفيد بحاجة ولا هيساعد، وتمادوا في سخريتهم منه،  
وكان رد "الطائر الطنان" عليهم..

"أنني أفعل ما ينبغي عليّ أن أقوم به في حدود طاقتي،  
ولن أقف أبداً ساكناً".

وبالرغم من سخريتهم منه إلا إنه استمر في إطفاء  
الحريق لحد ما الحيوانات حسوا بالخطر وابتدوا يشاركون  
في إطفاء الحريق..

في البداية كانوا بيسخروا منه، ولكن في النهاية بقوا  
يعملوا زيه..

مش صدفة لأ..



## "التسامح"

وأخيرًا مقالة عن التسامح، وحابه انقلكوا معنى التسامح بالنسبة ليا وليه بتعامل بتسامح مع الآخرين.. مبدئيًا كده في جملة دايمًا بقولها وهي..

"أنا مسامح كل حد زعلني مش حبًا فيه.. لا حبًا فيا.. بالتسامح بشتري سلامي النفسي" ..

أنا باعتبار التسامح كنز حريفًا مش كتير بيملكه.. سهل إنك تزعل وتتعصب وتقاطع وتلوم وترمي كلام يوجع، مش سهل أبدًا تسامح وتعدي وتنسى وتلتمس الأعذار، ومش هقولك خليك متسامح وتجاهل أخطاء الناس اللي بتحبهم عشان علاقتكوا متتاثرش وكل الكلام ده، ولكن هقولك خليك متسامح عشان نفسك

وعشان صحتك النفسية وسلامك النفسي ميتأثرش ..

تخيل معايا كده..!

أنت لو فضلت مع كل حد هتقابله .. أنا متضايق من ده .. وفلان عمل كذا..

كل دي طاقات سلبية بتتكون جواك .. هتلاقى نفسك فجأة بتتحول لـ "مكنسة طاقات سلبية" وبالتالي كل ده بيأثر فيك أنت .. كام مرة حسيت إنك مخنوق ومن غير سبب في حجر كده على قلبك ومش قادر تتنفس من كتر الضيق..؟!

مش هو ده السبب بس، في أسباب كتير ولكن خلينا في موضوعنا..

فشوف كام مرة بتكرر جملة "أنا مش مسامح فلان على كذا، ومستحيل أنسى إني اتعرضت لكذا.."

لاااااا ده أنا لازم أروح أديله كلمتين يوجعوه

وأخذ حقي..(وأنت متعرفش إن كل ده ضدك أنت)  
فساااالمحوا.. خرجوا الطاقات السلبية، متمحوش إنها  
تكون جواكم أصلاً...

## "الأخبار السلبية"

مش ملاحظين إن مفيش أي خبر سلبي لفت نظري  
في الجريدة دي، مؤخرًا بقيت متعمدة مشوفش ولا أقرأ  
أي خبر سلبي عشان مياثرش على نفسيّتي..

مش ملاحظ إن كل ما بتفتح أي منصة على  
مواقع التواصل الاجتماعي، بتلاقي أخبار سلبية..  
بسسسسسس! معقوووول مفيش أي شيء إيجابي  
بيحصل!؟!

ولكن دايماً بيركزوا الضوء على الأحداث عشان  
يكون عليها تفاعل أكثر!  
فنصيحة مني..

أي صفحة بتنقل أخبار سلبية متابعهاش.. أي حد

عندك ينشر أخبار سلبية أُمْنَع إن منشوراته توصلك،  
أحمي نفسك شوية من أي أخبار سلبية.. حرفيًا هتلاقى  
نفسيتك بقت أحسن..

تابع أخبار إيجابية.. ناس إيجابية.. (ناس إيجابية يعني  
بيدوا نصايح تخلّيك أحسن).

مش أغلب البلوجر اللي بتتفرج عليهم بتتعتقد من  
حياتك وإنك ليه حياتك مش زيهم كده فلوس ولبس  
وفسح وصور وحركات.. كل ده مجرد "Show" هدفه  
شغل مش أكثر، ملوش أي علاقة بالحياة الشخصية  
الطبيعية..!

فلو بتتفرج من باب إنك بتتابع تمام.. لكن بتتفرج  
وتتخفق وتتعتقد فبلاش!

عمومًا أنت أدري بحالك وعارف إيه هيضايقك وإيه  
هيحسن نفسيتك..

## "رسالة لبعض الناس"

كل حد فينا عنده كوليعة في حياته كفيلة تخليه عاوز  
الأرض تتشق وتبلعه ماشي، كل حد فينا عنده الي يخلي  
فرحته دايمًا مكسورة بس مكمل عشان مفيش "Option"  
غير أنه يكمل، متحملش حد شيلتك وتتهمه بإنه مش  
حاسس بيك، في حين إنه هو شایل شيلته وساكِت ومَش  
طالب حد يشيل معاه..

سمعاك وأنت بتسأل نفسك وعاوز تقلل من مشكلته  
كالعادة.. بتسأل نفسك باستهتار..

اييييه مشكلته يعني؟!

مش مشكلتك.. ميخصكش.. وأنت مالِك؟!

إن شاء الله تكون مشكلته إن صباع رجله الصغير

## التخبط في الباب ووجعه...

مش موضوعووووعك!

ملکش انک تقارن مشکلتک بمشکلته وتستقل بیها!

وتقول إيبىيه دالالالال أوووو مالال جالال إيبىيه التفاهة

دی؟!!

هو فاکر کده إنه عنده مشاکل؟

أه طبعاً ما هو مجربش الى أنا بمر به..

نعم؟ وهو يمر ليه؟! وهو ماله؟!

هو أنت عایش حیاتہ؟! عارف خبایاها؟! عارف هو

بیمر بایه من یوم ما اتولد حتی وقتنا هذا؟!

لما أنت كنت عايش في بيتك بكامل راحتك وصحتك..

هو في الوقت ده كان فين ويعمل ويواجه إيه؟!

وإيه حجم المعاناة اللي كان بيعيشها وبيقابلها؟!

لاااااا أنا آسفة يا عزيزي.. أنت ملكش الحق تمامًا  
تحكم على حد!

حط حبل أفكارك في مخك، وعينك في وشك، ولسانك في بقلك..!

لعل ربنا يهون عليك محنتك أو يطلعك منها لما يلاقيك  
بتهونها على غيرك يا نــــك تسبيبه في حاله!

ممکن؟ ہتعارف تسيب كل واحد في حاله؟!

عائلا رفة إنها صعبة وإني بتقل عليك "سووووري!"

بس ده مش فضلاً ولا كرم أخلاق منك... لا ده رغماً  
عن أنفك تمام..؟!!

لإن ربنا قالك.. دع الخلق للخاءاالق..



مش شايف إنك بره الموضوع؟!!

الكتاب خلص ولكن كلامنا لسه مخلصش أتمنى أكون  
كنت ضيفه خفيفه عليكم.. في رعاية الله إلى أن ألقاكم  
من جديد.. هسييلكوا بيانات الإتصال بي وهستناكوا  
تقولولي رأيكوا في الكتاب..

## الفهرس

(١) مقدمة

(٢) إهداء

\*\*\*

## الباب الأول أوجاع نفسية

(١) لسه شايف الدنيا سودة؟!

(٢) اتعود تقول لأ.

(٣) قبل ما تحاسب نفسك اسأل نفسك أنا بحاسبها  
ليه.

(٤) أنت اللي ادبتهم التصريح.

- ٥) أنت اللي كنت متاح طول الوقت.
- ٦) متخصصش حد أنه أقرب حد ليك.
- ٧) بلاش العشم ياخدك للسما.
- ٨) أنا السبب؟!!
- ٩) مين السبب؟!!
- ١٠) وجع مستخبي.
- ١١) العلاج في إيدك.
- ١٢) اتحكم في أفكارك.
- ١٣) حبل علاقاتك.
- ١٤) ما أنت مبتزعلش!
- ١٥) السم في لسانهم.
- ١٦) مساعدتك لغيرك مش فضل منك.
- ١٧) إيد لو حدها متسقفش.

- (١٨) متدافعوش عن الي ميستاهلوش .
- (١٩) كل واحد أولى بمشاكله .
- (٢٠) خانة الأمان .
- (٢١) متتعشمش زيادة .
- (٢٢) بطل تيجي على نفسك .
- (٢٣) أنت أهم حد في حياتك .
- (٢٤) أنا الست حشورة بحشر حالي في كل شيء .
- (٢٥) متسمحش لحد يشككك في نفسك .

## الباب الثاني

### موروثات اجتماعية

- (١) موروثات اجتماعية .
- (٢) النفاق الاجتماعي .

- (٣) جمعية ودائرة يا ريس.
- (٤) جيل التسعينات والألقاب الاجتماعية.
- (٥) بصر للأقل منك.
- (٦) ما أنتِ قوية وعديتِ بالأصعب.
- (٧) خرجتِ عن الملة.
- (٨) مصدر دعمهم الأول.
- (٩) وقت النجاح.

## الباب الثالث

### رسايد ربنا لبنا

- (١) مفيش حاجة في حياتنا بتحصل صدفة.
- (٢) النفاق الاجتماعي.
- (٣) موقف حصليّ.

- ٤) تسويق بشكل مختلف.
- ٥) جبر الخواطر.
- ٦) متاخدوش بالمظاهر.
- ٧) الاغتراب النفسي.
- ٨) رسالة للناس الي بتحكم على غيرها.
- ٩) بلد العميان.
- ١٠) رسالة من إنسان سعيد.
- ١١) الطائر الطنان.
- ١٢) التسامح.
- ١٣) الأخبار السلبية.
- ١٤) رسالة لبعض الناس.

## السيرة الذاتية

نورهان عبد الرازق إمام كاتبه مصرية واخصائية  
إرشاد نفسي وأسري وزواجي ومدرب معتمد من  
جامعة عين شمس.

## بيانات الاتصال

Gmail ( nourmahmoud220@gmail.com )

Facebook ( Nourhan Abd Alrazik )